

Onna Catrina Cavegn-Pally, Sedrun



G.F. Ei tucca da miert. Sa per tgi? Tgi era malsauns – ni eisi forse ina mort nunspetgada ni ina disgrazia? Ei fageva tut in mal cura ch'ins udeva il zenn da miert. Mo quella ga ha igl aunghel dalla mort fatg viseta egi asil da s. Martin tier nossa zun preziada e stimada vischina: Onna Catrina Cavegn-Pally che sesanflava leu en tgira. Leu ha ella surdau si'olma al suprem Scaffider ils 10 d'avrel 1989. Sco ella ei vivida eis ella era morta.

Arrivada

Onna Catrina Cavegn-Pally ei na-

9.5.89 GP

schida ella biala ucliva da Camischolas ils 11 da zercladur 1906. Ed en quei ambient ha ella passentau ina sulegliva afonza el miez da geniturs e fargliuns. Ei fuva onns maghers ed ins vegneva beinspert mess ed endisai alla lavur ed oraziun. Dad auter savevan ins nuot. Ins fuva cuntents cun quei pauchet ch'ins possedeve. Havend finiu las scolas primaras a Sedrun e las secundaras a Camischolas, ha nossa cara trapassada stuii prender la valischa ed ir naven per gudignar in pèr raps e gidar a casa. Aschia va ella a Breil tier purs per in onn. Da leu va quella stupenta mattetta a Sarnen el collegi per 5 onns. Ella vegn in tec pli maneivel da casa. Ad Andermatt lavura ella en in renomau hotel duront 5 onns e lu tier in fotograf. Lu retuorna ella a Camischolas ed ei cuntenza. – Sco tuts carstgauns ha era ella stuii sentir la direzia dalla veta. Mo la trapassada ha dau damogn. Ella veva ina cardientscha nunballucconta.

Maridaglia ed atgna famiglia

1932 anfla la buna Onna Maria siu spus, il Lucas Cavegn, posttenent a Sedrun, ch'era a tuts bein enconuschents (il Lucas dils Adolfs). Aunc quei onn van els agl altar dil Segner e siaran la ligia. E cul temps han ei era astgau metter 7 affons en tgina. Quei ei stau la legria dalla cara Onna Maria e siu consort e

bab. Sa co quella buna mumma e bien bab han tarlischau cura che els han astgau dar ina da lur feglias alla Claustra da muniessas a Glion. Era ils auters affons han bunas posiziuns. Il feagl vegl, il Rudolf, ha suenter la mort dil bab Lucas survegniu l'administraziun da posta ed ei daventaus successur. Ils auters ein era tuts bein piazzai.

Ina biala sera dalla veta e finizium

La buna Onna Catrina ei buca stada bia malsauna. Ella ha giu la cuida da vegnir sin in'aulta vegliadetgna da 83 onns. Ella steva a Sedrun en casa sper ses cars che han era adina giu grond quitau dalla cara mumma, tatta e basatta. Il settember vargau ha ella stuii ir el Spital a Glion – muort maldispostadad. Igl october eis ella serendida ella Casa da vegls s. Martin a Trun. Leu han ins giu bien quitau dalla mumma, essend che la buna sora e feglia Mudesta era leu. Da tut cor seigi engraziau per la buna tgira e la carezia che las venerablas soras e tut il personal da quella partiziun han prestau. Il davos viadi ei succedius ella Casa da vegls s. Martin. Per tontas cartas cun s. messas e donaziuns caritativas, che la defuncta ha astgau retscheiver, seigi engraziau. Als restai anavos nossa pli sincera condolientscha. La glisch perpetna sclareschi alla cara Onna Catrina ed a tuts nos defuncts. RIP